

Abogado Karel Frielink:

REGLAMENTU DI ORDEN TA PA FUNSHONAMENTU NA DRECHI DI PARLAMENTU

WILLEMSTAD.- Meta di reglamentunan manera Reglamentunan di Estado i Reglamentu di Orden a keda instituí pa evitá arbitrario. Pa duna un ehèmpel, suspenshon di reunion su intenshon ta pa duna parlamentarionan chèns di lùch òf sosegá pa despues sigui debatí, no pa e loke ku a pasa dia 24 di ougùstùs último, asina Dekano di Orden di Abogado mr. Karel Frielink a trese dilanti durante su disertashon na okashon di instalashon di tres hues pa Korte komun.

Frielink a duna di konosé ku no ta pòrnada a bin ku e nòmber, reglamentu di órden. E reglamentu aki tin reglanan pa un funshonamentu na drechi i ordená di Parlamentu.

Ora tin duda kon ta ehekutá e reglamentunan

aki, ta e mayoria den Parlamentu ta disidí i no e Presidente di Parlamentu ta disidí kon tin di ehekutá e reglamentu di òrdu.

Esaki ta un prerogativa di Parlamentu. E presidente di Parlamentu ta obligá di duna e parlamentario ku ke papia di e situashon e palabra i e mester haña e oportunidat aki.

Pues ta trata aki di un porta habrí segun Frielink. Pero poder por keda mal usá, ounke ku e poder aki demokrátikamente ta reglá.

Pa duna un ehèmpel, Frielink a bisa ku outoridatnan por keda malusá, dor di usa esaki pa un otro propósito.

Por ehèmpel, suspenshon di reunion di Parlamentu, su intenshon ta pa ora ku miembronan a debatí hopi ora largu, ta pidi pa suspendé e reunion

un ratu pa duna tur hende chèns pa kome i bebe algu. Pero no manera a suspendé e reunion di dia 24 di ougùstùs último.

Un aspekto ku tin den e reglamentu di órden, pa loke ta trata suspenshon, ta ku e presidente di Parlamentu ta disidí riba esaki, pero e loke ku e reglamentu a faya kuné, ta un regla pa evitá e presidente hasi mal uso di esaki. E desaroyonan resien ta mustra bon kla ku den e sistema hurídiko aki tin fayonan o sea burakunan.

Fayonan ku a pone ku miembronan di Parlamentu a posishoná nan mes linia rekta kontra di otro, kaminda violensia verbal a haña su kaminda di mal pa pió. Tin biaha e sintimentu ta bin ariba, segun Frielink, ku aki ta lei di "jungle" ta konta.